



Alebin mailako atezainen entrenamendua eguaztenean, Jesus Barberorekin. | AMAIA TXINTXURRETA

Bete-beteen hasi du ikasturtea Azkoagaine

Aloña Mendiko, eskola kiroleko eta beteranoen partiduak han jokatu dira

OIHANA ELORTZA | OÑATI

Bete-beteen hasi du ikasturtea Azkoagain futbol zelaia. Aste-buruetan jokatzen diren partiduez gain, herriko futbol taldeek horixe egiten dituzte entrenamenduak. Eskola kiroleko partiduak ere hantxe izango dira eta beteranoek ere Azkoagainen jokatu dituzte aurtengo txapelketako lehiak. "Araututako herriko futbol taldeak Azkoagainen ibiliko dira, bai; baita Eskola Kirola ere, oraingoz, behintzat. Ikasturtea horrelaxe hasi da", baieztatu du Oskar Carrascalek, Udaleko Kirol teknikariak.

Larrañako futbol zelaia ere erabilgarri dago eta eskola orduetatik kanpo edozein herritarrek edo taldek erabil dezake. Oraingoz, baina, futbolearen jarduten duten herriko taldeek ez dute

zelai hori erabiliko. Erabili gura duenak, baina, Zubikoa kiroldegian egin behar du eskaera.

Aloña Mendiko 11 talde

Aloña Mendik jakinarazi duenez, kirol elkarte horretako futbol saileko talde guztiak Azkoagainen entrenatzen dira. "Denboraldi-aurrean talderen batzuek, puntualki, erabili dute Larrañako zelaia, baina garai honetan, eta Larrañan argi artifizialik ez dagoela kontuan izanda, futbol zelai hori ezin dugu erabili", gehitu dute Aloña Mendiko futbol saileko kideek.

Ohorezko erregional mailatik alebin mailara bitartean, Aloña Mendiko 11 futbol taldek erabiltzen dute Azkoagain. 17:00etatik 21:30era bitartean egiten dituzte entrenamenduak.

Beteranoetan, 16 talde

Bestalde, asteburu honetan hasiko da herriko futbol taldeen txapelketa, beteranoen txapelketa, alegia. Asteon egin dute bilera eta bihar, zapatua, jokatu dute lehen partidua; Paketinaikos eta Indar 85 taldeen arteko partiduak hasiko du haien denboraldi berria. Asteburu honetan zortzi taldek jokatu dute eta hurrengoan, beste zortzik. Azkoagainen izango dira partiduak.

2013-2014 denboraldian 16 talde lehiatuko dira beteranoen txapelketan, iaz baino bi gutxiago. Baxa eman duten taldeak dira: The Gibel Boys, Lozorromo eta Ankarteko. Deboraldi honetan lehiatuko den talde berria, berriz, Kili Kolo taldea da.

Eskola Kiroleko asteburuko partiduak ere bihar hasiko dira.

Pertsonen erreskate simulakroa egingo dute bihar Gesaltzan

O.E. | OÑATI

Erreskate baten simulakroa egingo dute bihar eta etzi Gesaltzako kobazuloan. Euskal Espeologoen Elkarteak antolatutako simulakroa izango da, eta Aloña Mendiko Espeleologia Taldea izango da laguntzailea; hark egingo ditu azpiegitura lanak. Hau da, AMETek prestatuko ditu lokalak, kobako putzuak instalatuko ditu, eta baita kobako ibilbideak balizatu ere.

100 lagun

Urtean behin antolatzen dute horrelako simulakro bat Euskal Herriko koba ezberdinetan, eta aurtén, Oñatiko Gesaltzan egingo dute.

Guztira, 100 bat lagunek hartuko dute parte simulakro horretan. Parte hartuko duten taldeak dira: EEL Espeleologoak,

Gurutze Gorriaren mendi unitatea, Gipuzkoako DYA, Bizkai-ko suhiltzaileak, Toledoko suhiltzaileak, Ertzaintzaren brigada mugikorra eta beste herrialde batzuetako espeleologoak.

Eteotik Gesaltzara

Erreskate simulakroaren praktika bihar, zapatua, goizean hasiko da, 09:00etan. Eteo erakinean jarriko dute kontrolgunea eta hantxe elkartuko dira sorosle guztiak. Handik kontrolatuko du simulakroa, horretarako erabiliko dituzten aparailuekin: talkieak, tedrak eta koba barruko telefono lineak. Horrela, Eteotik bertatik koba barruraino komunikazioa egongo da aginduak bidaltzeko. AMETek, bide batez, eskerrak eman gura dizkio Udalari instalazioa uztearren.



Aurretik egingako beste simulakro batean ateratako argazkia. | AMET

500 euro banatuko ditu Txandak urria bukatu arte

O.E. | OÑATI

Txanda elkarteak 500 euro zozkatuko ditu urrian bezeroen artean. Bost euroko 100 erosketa-txartel zozketatuko ditu edozein saltokitan egiten den hurrengo erosketan trukatzeko erosketa-txarteletan. Sari horiek erosketak Txanda txartelarekin egiten dituztenen artean banatuko dituzte, zoketarik gabe. Bezeroak saria edozein dendatan trukatu ahal izango du, txartelaren balio berbera edo handiagoa duen erosketa egiten duenean.

Saritua suertatzen den bezeroari, erosketaren bi txartel emango dizkiote. Horieta-ko bat beste erosketa baten truke erabili ahal izango du eta bestea dendariarendako izango da. Urriaren 31ra arte iraungo du kanpainak.

Emakume trikitilarien omenezko jaialdia

O.E. | OÑATI

"Emakumeek egin duten lan bikaina trikitia munduan eta baita trikitia indartzen egingako lanagatik", aurtén emakume trikitilariak omenduko dituzte trikiti festan. Urriaren 26an da, Lizargarate Oñatiko Trikitizale Elkarteak egingo duten V. Trikiti Jaialdiaren barruan.

Hori kontuan izanda, emakumez osatutako zazpi talde ekarriko dituzte egun horretan Santa Ana aretora, baita oñatiarrak ere. Jaialdira joateko txartelak salgai daude Urbia eta Arrano tabernetan, 10 eurotan. Egun horretan, gainera, afaria egongo da gaztelekuan, eta afariko txartelak ere taberna bi horietan eskura daitezke 20 euroren truke.

Nobel saridunekin batera ikasle oñatiarrak

Passion for Knowledge jaialdian parte hartu dute Elkar Heziko lau ikasle. Nobel saridunen eta DBHko ikasleen arteko topaketa horrek zientzia eta teknologia ikasketei begirako bokazioa sustatzea du helburu. Argazkian daude: Ana Novoa, Josune Odriozola, Ane Mondragon eta Irati Abaun.



ELKAR HEZI